

AKASHVANI AIZAWL

REGIONAL NEWS UNIT



NATIONAL SPORTS DAY 2025 HMANG

Lunglei West bialtu MLA Pu T. Lalhlimpaia'n infiamna chu mihring hriselna atana pawimawh, taksa vawng thatu leh rilru hrisel siamsaktu a ni a ti a, Infiammite chu hmasawn tum zel turin a chah.

Vawiina National Sports Day, Sports Authority of India (SAI) State Training Centre, Mission Vengthlang-a a hmanpuinaah he thu hi sawiin, Pu T Lalhlimpaia chuan infiamna chu mihring hriselna atana pawimawh, taksa vawng thatu leh rilru hrisel min siamsaktu a ni tih sawiin, mihring inpumkhatna siamthatu a ni a ti a. Infiammite chu an thlen chin atanga hmasawn tum zel turin leh tumruhna leh teirei peihna nei turin a chah bawk a ni.

National Sports Day hi India ram Hockey khel thiam lar tak Major Dhyan Chand-a piancham pualin India ram pumpuiah hman thin a ni a, thupui atan “Sport to Promote Peaceful and Inclusive Societies” tih chu hman a ni a. Mizoramah a lawmna pui ber chu Sports Authority of India (SAI) State Training Centre, Mission Vengthlang-ah neih niin, infiammi kalkhawmte chuan taksa leh rilru hrisel nei turin hma an lak tur thu leh an chhungte leh an thiante pawh infiamna lama tui tura fuih turin thu an tiam rual a ni.



LALREMSIAMI HMAR : NATIONAL SPORTS DAY

India Hockey player Lalremsiami Hmar chuan India in kum 2047 a ram hmasawn Viksit Bharat a thlen theih nan sawrkar laipui hmalakna hnuaiah infiamna kawnga hmasawwna tam tak a thleng tih a sawi.

Lalremsiami chuan sawrkar laipui hmalakna hnuaia hmasawwna chuan thalai tak tak eizawwna a hmuh bakah India hmasawwna chu khawvel mithmuhah a phochhuak a ti a,thalaite chu taksa hrisel zawk an neih theih nan leh natna hrang hrang laka inven theih nan taksa insawizawi leh infiamna ngaih pawimawh a tul thu a sawi.

Lalremsiami chuan Hockey player ropui Major Dhyan Chand pian champhaphak chu Hockey player a nihna angin a ngaihlu hle a ti a, zahna chibai a buk thu a sawi bawk.



11 YEARS of PMJDY

Sorkar laipui hmalakna hnuaia pawisa ngai lova Bank account hawn theihna, Pradhan Mantri Jan Dhan Yojana hnuaiah Mizoram Rural Bank chu Mizorama account hawng an tam berna a ni.

Akashvani Aizawl zawhna chhangin, MRB head office, financial inclusion, manager Pu V. Lalrinmawia chuan PMJDY chu India rama mipui zawng zawng, mi harsa zawk te pawhin Bank account an neih theihna tura sorkar laipui hmalakna a ni a ti a, Mizoramah pawh Bank hrang hrangten hma an la tih sawiin, Mizoram pumah PMJDY account nei mi nuai 4, sang 3, 79 an awm a, chung zinga, account nuai 3, sing 1, sang 4, 259 chu Mizoram Rural Bank a mi a ni a ti a, mipa account nuai 1, sing 4, 5691 leh hmeichhe nuai 1, sing 6, sang 8, 568 an ni a, Mizoramah MRB chu PMJDY account hawng tam berna a ni a ti a, account la siam ve lote chu Sorkar lakpui hmalakna hnuaia Bank account hawn theih tha tak tak te chu ngaihvena hmang tangkai ve turin a sawm a. Hei bakah hian an bank account in kum 10 a tlin hunah an bank account a buai loh nan KYC re-verification nachang hre turin mipuite a chah a ni.

Pradhan Mantri Jan Dhan Yojana hi kum 2014 August ni 28 khan Prime Minister Pu Narendra Modi chuan hawngin, kum 11 chhungin ram pumah account vbc 56 hawn a ni tawh a, heng zinga za zela 56% chu hmeichhiate tana hawn niin, hmun 3-a thena hmun 2 chu khawpui pawn, Rural leh Semi Urban a cheng te tana hawn a ni.



AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve ah Chanchinthar puan leh a ni ang.



LADC BUDGET SESSION

Karleh thawhlelni September 2 thleng awh tur Lai Autonomous District Council, Budget Session chu vawiin khan LADC Session Hall, Lawngtlai ah Chairman Pu VL Hmuaka kaihhruaina hnuaia tan a ni.

Session ah hian Chief Executive Member Pu N Zangura'n kum 2025-2026 LADC sum hman tura ruahman leh sum hmanna tur te House ah a pharh a, CEM chuan kum 2025-2026 chhunga LADC Budget atan ruahman zat chu Cheng Nuai 26,355.07 a ni tih sawiin, Chhiah tlingkhawm atanga hmuh beisei cheng Nuai 421 a nih thu a sawi a, Budget pumpui atangin Cheng Nuai 21,202.50 chu thawktu hlawh a hmantur a nih thu a sawi.

Pu N.Zangura chuan Chhiah tlingkhawm atanga pawisa hmuh thinte chu tangkai taka hman a nih thin thu sawiin, Budget tharah Nuai 421 hmuh beisei pawh mipui, chhiah pe thinte leh thawktute vangin an beiseizat an tlin ngei a beisei tih a sawi a, kum kalta aiin Budget punna chu cheng nuai 1392.36 a ni tih sawiin Mizoram Sorkar chungah lawnthu a sawi.

Vawiin Session ah hian Eptu lam ZPM Legislature Party hruaitu, Opposition Leader Pu V Zirsanga chuan Session koh a nihdan ah LADC dan palzutna a awm tih sawiin, inhnial buaina thleng kar ah Chairman chuan Session hi karleh Thawhtanni a chhunzawm turin a titawp a ni.

(Lalngheta Ralte PTC Lawngtlai)



PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat’ programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 125-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

(NewsonAIR)

